

Barth/vnd Haar wachsen zu machen?

Nim Bienen so viel du wilt/ brenne sie zu Pulver/ mische darunter gleich so viel Leinsamen / auch zu Aschen verbrent/ Eyderenöl/ (sind der wälschen Eyderen) so viel gnug ist / schmiere damit den kalten Ort/Morgens vnd Abends/da du wilst Haar haben / so werden daselbst bald viel Haar wachsen/vnd nit bald außfallen / du solt aber das Haupt zuvor mit solcher Laugen abwaschen: Nim Laugen von Nebenaschen gemacht / koch darinnen Capillum veneris, Agrimonien, Ephew / ana ʒ. M. darnach seige vnd behalt die Lauge bedeckt/vnd wenn du das Haupt 2. oder drey mal alle Wochen gewaschen / vnd widerumb getrocknet / vnd mit obgenandter Salben geschmieret / so wachsen die Haar in grosser menge vnd lang/ vnd stehen fest. Wenn du das Eyderenöl nicht hast/ magst du es auff solche weise bereiten. Nim grüne lebendige Eyderen/ koch sie in Baumöl/ biß sie zerfallen / setze es hernach 14. oder 20. Tage an die Sonnen/ so ist es gut.

Haar wachsen machen an welchem ort du wilt?

Nim jezgedachter Heydechsen oder Meerfrösche/schneide ihnen die Köpffe vnd Schwänze ab / dörre sie in einem Backofen / stosse sie zu Pulver / mische darunter Eyeröl / schmiere die kalte statt damit/ so gewinnest du daselbst in kurzer zeit Haar.

Item/nim Eberessen kraut/zu Aschen gebrant/vnd mit Wunderbaum/oder Kettichöl vermengt/vnd damit bestrichen/ist gut für das Haar außfallen / auch das Kinn damit bestrichen / machet den Bart sehr/vnd schnell wachsen.

Item / nim drey lebendige Frösche / brenne sie in einem Hafent zu Pulver/ temperir es mit Honig/ salbe damit den ort / da du wilt Haar haben/so wachsen in kurzer zeit viel Haar daselbst.

Item / nim Leinsamen / verbrenne ihn zu Aschen / temperir es mit Baumöl/schmiere damit den ort.

Item/nim gute Hauptlaugen / koch darinnen frisch Venus-Haar/